



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 8 Yangia anidakangma : f Tir Yimiyim tiryimiyim@aolima tir yimiyim TAPAK 7

Wolves-i defender Craig Dawson alizükogo

Brazil Tir Lula-i army commander mapa nungi anentsü



VOL. XX NO. 101 (ADOK 101) DIMAPUR TENTONÜ (MONDAY) ANEJETI (JANUARY) 23, 2023 ₹ 5.00

Nagaland nung Rs 18.50 crore alang mozü & yi apu

Dimapur, January 22, 2023

(Agencies): Nagaland police-i tesüiba hopta ka tsüingda Rs 18.50 crore tashi ozüing alema yi aser mozü shibelenba puogo.

Police-i mozü aser prangpong shibelenba aser ozüing alema senotsü amshiba mita ao ta ketdangsiir kati ashi.

Iba mapang Nagaland kübok tesem balala nung Rs 3.43 crore alang drugs, Rs 21.25 lakh alang foreign liquor aser Rs 14.84 crore alang tanga ozüing alema shibelenbatem apu.

Police-isa Rs 50,900 alang prangpong-injang apu ta

ketdangsiirisa ashi.

Election Commission of India-i taoba Bodbarnü Nagaland Assembly elections indang osang metetdaksüogo aser iba sülen ozüing alema inyaksangshiba mitba mapa tesashiba inyaker.

Election atema Model Code of Conduct benoka aliba mapang public-i police den amalitepa yaridaksünür ta Nagaland Police-i metetdaksüo.

Züngsem 60 agi akümba Nagaland Assembly indang polling February 27 nü agitsü aser march 2, 2023 nü votes azüingtsü.

Manipur telungpurtemi R-Day mokdangtsü

Imphal, January 22, 2023

(Agencies): Manipur nung telungpur telok 6-i tenzükba Coordination Committee (CorCom) ajanga January 26 Republic Day mokdangtsü ayongzükogo.

January 25 ayaterm nungi CorCom-i Manipur ajungalen ghonda 18 mokdangtsü metetdaksüogo.

January 25 ayaterm nungi tenzükbaji January 26 nikongdang 6:00 ako tashi alitsü ta CorCom publicity committee-i sangdong ka nung ashi.

CorCom nung KCP, KYKL, PREPAK, PREPAK (Pro), RPF aser UNLF teloktem dena lir aser parnoki Manipur linük balaka akümtsü atema rarar.

CorCom-i mokdang ayongba nung tamangba yimsü sentongtem, water supply, health, aser emergency services madentsü ta publicity

committee-i ashi.

Manipur nung alirtemi India kübok state ka ama aliba nung pelatsü nüngdak madoker aser Republic Day benjungmong nung madentsüla. 'Manipur/ Kangleipak' ya linük balaka liasü aser 1947 küm India nüjiso angutsü anogo ka jakdang British nung yimsüsüba nungi nüjiso angu, ta CorCom-i metetdaksüo.

Centre aser state sorkartemi telungpurtem den yimten olemtep alitsü kishi lapoka lir ta ashir saka onoki India sorkar den Manipur linük balaka aser nüjiso atema dang yimten olemtep alitsü ta parnoki ashi.

Ano, Manipur nung National Revolutionary Front, Manipur (NRFM) ta ser telungpur telok kati January 25 ayaterm nungi January 26 nikongdang 6:00 ako tashi ghonda 18 mokdangtsü metetdaksüogo.

Nashi tepsetba anenra alima khuretem samatsü

New Delhi, January 22, 2023

(Agencies): Gujarat nung okadak kati nashi shibelenba atema nisung ka taküm piyong tepuokdak ayutsü temerenshi agütsüogo.

"Nashi tepsetba ya anenra alima nung khuret ajak koktettsü" ta Tapi district court nung Principal District Judge Samir Vinodchandra Vyas-i ashi.

"Nashi scü agi yangluba kitem atomic radiation ajanga timtem magütsür aser ibaji science-i kuli ngutetogo. Ano nashi indang natzü ajanga taneptsü makokba tashidak aika aneptsür" ta Vyas-i ashi.

Nashi nungi tamangba yimsü aru, ta Principal District Judge-isa ashi.

Ajisüaka, pai ashiba onüktem asoshi scientific kuli kecha mali. Hindutva lennirtemi ibala olen aika jembir saka health mongintemi itemji aija arur.

"Nashi ya shiruru ka dang

masü saka tetsü ka lir. Nashi ya temeshi tesem crore 68 indang living planet ka lir" ta Vyas-i ashi.

Gujurat okadakisa ken o angadandang shlokas aika nung ajemdaker jembir aser "nashi ya jashia yutsüra asen rongsen aser kiojen samar" ta okadakisa ashi.

"Alima tsüngsang-mongpu melenshiba ya nashi tepsetba ajanga lir. Asenok kanga kara ain adokba ajanga khuretem adoker. Nashi tepsetba anen nung dang saatvik climate change mapa meinyaktettsü" ta Principal District Judge-isa metetdaksüo.

Nashi shibelenba atema apuba ya Mohammad Ameen lir aser pai nashi 16 bener arudang, nashi amentsü mesüra achiajemtsü indang kecha mali bener aru ta tai tonglokja apu. 2020 nung Ameen-i Maharashtra nungi nashi bener aruba atema apu aser pa dang Rs 5 lakh senchi achiba den taküm piyong tepuokdak ayutsü temerenshi agütsü.

Eastern Naga nungeri ENPO bangzüng akangshir; Election mokdangtsü

Dimapur, January 22, 2023

(TYO): Eastern Nagaland nung alirtemi meshiba "Frontier Nagaland" magütsüra State general election 2023 nung shilem magütsü ta Khiamniungan Tribal Council (KTC)-i Deobarnü sangdong ka nung metetdaksüogo.

January 13, 2023 nü Noklak Headquarter nung KTC-i anir Khiamniungan nung lokti tentetem aser village councils külem senden ka amending August 26, 2022 ENPO bangzüng pusema nungittsü akangshitepa liasü ta sangdong nung ashi.

Khiamniungan nung lushi nung kija nisung shingaiia nomination masütsü aser iba tetuyuba sülen manidakertem dak langka danga atalokra KTC-i tebilemtsü khuret kecha mabentsü, ta sangdong nung shia lir.

New Delhi, January 22, 2023

(Agencies): Prime Minister Narendra Modi-i nütsüng agi tangar memenepeba teloktem asoshi inyaksü tuyuba sülen BJP Minority Morcha-i Lok Sabha constituency 60 ajitetogo.

State 10 aser Union Territory 1 ka nung parnoki Lok Sabha constituency tem ajitet aser item constituency nütsüng agi tangar memeneper 30% tema lir.

BJP Minority Morcha-i item Lok Sabha menden nung ita pezü outreach programme agitsü aser iba nung Congress lennir Rahul Gandhi'er constituency Wayanad

Iba mapa inyaksü atema KTC-i Khiamniungan Students' Union (KSU), Khiamniungan Menyiu Hoikam (KMH), Village Councils, Noklak Town Sectors Union aser Village Public Organizations nem tashi ajunga agütsür ta KTC-isa metetdaksüo.

Phom Peoples' Council (PPC)-ia tanga sangdong ka nung August 26, 2022 ENPO bangzüng pusema nungittsü aser 2023 General Election nung shilem magütsü metetdaksüogo.

Phom nungeri kari danga NLA election 2023 atema nomination agütsüra Phom nungeri lima nungi aridoktsü aser iba tebilemtsü khuret ya nomination asüba nisung indang yimi abentsü, ta Press and Media cell, PPC-i sangdong nung ashi.

PPC-isa village councils, Phom Students' Conference & its federating units aser Phomla Hoichem nem tashi agütsüogo.

Maneni, Honibarnü Chang Kulei Setshang (Chang Tribal Council) aser United Sangtam Likhüm Pümji ajanga sangdong balala nung August 26, 2022 ENPO bangzüng pusema nungitba aser 2023 NLA election nung shilem magütsü indang metetdaksüogo.

Chang Kulei Setshang-i Chang Wedoshi Setshang nem iba bangzüng mapa küma inyaksü atema tashi agütsüogo aser Chang nungeri lushi nung political campaign masütsü tenokdanga agütsüogo.

USLP-ia nomination masütsü tuyuba den United Sangtam Students Conference (USSC), Akehta Sangtamlarü Thsingmüjang (AST) aser village councils nem tashi agütsüogo.

Nisung kari dang USLP tetuyuba alema inyakra Sangtam nungeri senso agentsü ta parnokisa metetdaksüo.

PM Modi-i tuyuba sülen BJP-i minority outreach inyaksü

New Delhi, January 22, 2023

(Agencies): Prime Minister Narendra Modi-i nütsüng agi tangar memenepeba teloktem asoshi inyaksü tuyuba sülen BJP Minority Morcha-i Lok Sabha constituency 60 ajitetogo.

State 10 aser Union Territory 1 ka nung parnoki Lok Sabha constituency tem ajitet aser item constituency nütsüng agi tangar memeneper 30% tema lir.

BJP Minority Morcha-i item Lok Sabha menden nung ita pezü outreach programme agitsü aser iba nung Congress lennir Rahul Gandhi'er constituency Wayanad

dena lir.

BJP züngsemtemi constituency shia nungi Prime Minister Modi mesüra pa indang welfare programmes asoshi tenüngsang agütsür nisung 5,000 bushitsü aser parnokji ambassadors ama amshitsü.

Iba sentong atema BJP-i taküm March-April nung scooter yatra aser sneh yatra ayongzüktsü. Iba sülen May ita Delhi nung public rally ka agitsü aser idakji PM Modi adentsü aser Lok Sabha menden 60 nungi ambassadors ajak adentsü.

"BJP National executive

senden nung Modi-i ashiba inyaksü atema onoki sentong ka renemogo. Prime Minister-i nisung ajak atongtsü aser telok shia merenlokra, India merenloktsü ta ashi" ta BJP Minority Morcha national president Jamal Siddiqui-i ashi.

"Modi-iba ya votes atema meinyaksüla ta onok dang saka political party ka asü nung onoki elections nung takok angutsüla. Anungji onoki sorkar sentongtem telok ajak atongtsü aser kasa mapang loktiliba nung BJP ulushitsü atema inyaksü" ta pai ashi.

74 buba Republic Day parade nung tableaux 23 sayutsü



74 buba Republic Day atema renemshiba noksa angur.

New Delhi, January 22, 2023

(Agencies): January 26 nü Republic Day benjungmong nung State aser Union Territory aikati Kartavya Path nung tableaux sayutsü.

Assam, Maharashtra, Uttar Pradesh, Jammu and Kashmir, Ladakh, Gujarat, West Bengal aser tanga state o Union Territory temi Republic Day parade nung shilem agitsü.

"Taküm parade nung tableaux 23 sayutsü. Item ya state aser Union territory 17 aser ministry o department balala 6 indang

asütsü. Parnoki India sobaliba aser rongsenketzüng den lokti tejakleni aoba indang sayutsü" ta Deobarnü Defence Ministry ketdangsiirtemi ashi.

Union ministry aser central government agencies nungi Ministry of Home Affairs ajanga tableaux ana sayutsü, ka Narcotics Control Bureau (NCB) aser ka Central Armed Police Forces (CAPF) indang asütsü.

Ano, Ministry of Agriculture, Ministry of Tribal Affairs, Ministry of Culture aser Central Public Works Department ajanga

tableaux kaka sayutsü.

R-Day parade nung tableaux 23 sayuba den Army, Navy aser Air Force ajanga shilem agitsü aser DRDO ajanga gari ka sayutsü ta ketdangsiir ashi.

Taküm state aikati 'Nari Shakti' omen shimogo aser iba dak alia sobaliba senmang aser tanga omentem lir, ta paisa ashi.

West Bengal tableau ajanga Kolkata nung Durga Puja sayutsü aser iba ya UNESCO indang Intangible Cultural Heritage List nung densemba atema lir.

Assam indang tableau nung Ahom general Lachit Borphukan aser Kamakhya Temple dena sobaliba tesemtem sayutsü.

Yaküm Rajpath ta aliba nungi 'Kartavya Path' ta melen aser taküm mezüing atema tenüng melenshir Republic Day amongtsü.

"74 buba Republic Day ya Central Vista avenue nung amongtsü aser sorkari nübortem atema online ajanga ticket 32,000 ayoktsü lapoktsüogo" ta Defence Ministry ketdangsiirtemi metetdaksüo.

Jotsoma nung NCC training camp tenzükogo



Jotsoma nung NCC training camp mapang tangokba noka angur.

Dimapur, Aenjeti/January 22 (TYO): Southern Nagaland nungi NCC cadets pur atema training camp ka Kohima Science College, Jotsoma nung Hokulbarnü tenzüka lir.

Associate NCC Officers trok aser NCC Group HQ, Kohima nungi Army personnel tem kübok cadet 231 training agiba mapang lir.

Kohima region nung tzüngsang kanga temokong süaka cadet temi tejangraba tulu nung iba training nung shilem agir.

Hopta tatemlen cadet tem ya Forest Department staff temi Puleibadze Peak leni anir atu aser iba mapang lipajen indang

parnok den jembia shisa lemsatepa liasü.

Kasa mapang cadet temi iba lenmang nung mürek-mejua liasü. Army temi cadet tem nem nok-nü tila amshiyim indanga sayua liasü.

Parnok dang camp yanglutsü yimyattem sayu asr Medical Department nungi Dr. Ruyangulie-i cadet tem den Hokulbarnü jembia liasü. Iba mapang pai temang anema aser müreka alitsü indang yimyattem sayu aser asükwa mapang temang lema ayutsü indanga sayua liasü.

Honibarnü Brig PS Sangwan, Group Commander Kohima ajanga cadet tem den

sensaksem kaa liasü. Cadet tem atema 1 Assam Rifles ajanga band display aser weapon display sayua liasü.

Linük yangerba nung mitkar temi shilem agiba angatetdaksütsü nükjidong nung cadet tem dang mitkar puti otsü indang documentary tem sayua liasü.

Iba camp nungi senior cadet tem January 26, 2023 nü Republic Day nung shilem agitsü renemshiba mapang lir.

Parnok iba sentong nung maziügi alidang junior cadet tem January 26-27, 2023 anogotem A Certificate NCC Exam agütsütsü. Iba camp ta Hokulbarnü tembangtsü.

Asür Alemchuba kinunger den asükhu lemsateper

Dimapur, Aenjeti/January 22 (TYO): Tsürabur Alemchiba Atsongchanger, January 22, 2023 nikongdang iba ali wadang tembangba osang angashia kanga aoksar aser nemjemseta bilemer, ta Ao Senden tir Chubawati Longchar ajanga sangdong ka nung ashi.

Tsürabur akümüli tembangba

ajanga Aor asoshi akümdong tajung ka laogoni ta sasaseter aser azüngmeyaka bilemer. Pa asüba ajanga Ao Senden menden nunga tenungiter ongdang tazüngla tuluka ait ama rataseta aser sasasete bilemer. Pai Ao Senden tenzüka aruba:

1. 2005-2008 : Sanen Luden züngsem.

2. 2012-2014 : Ao Senden Kimen.

Tsüraburi toktsür aoba kinungtsü aser kinungertem iba asükhu mapang nung Tsüngremi nenok nem tesünap agüjang ta sarasademja atar. Tsüngremi asür tanela teti anisüngzükdak yujangma ta sarasademer, ta kasa sangdong ajangasa ashi.

Congress Minority Cell Nagaland ktdangpur tasen shimogo



Congress lenir aser Congress Minority Cell Nagaland ktdangpur tasentem tangokba noksa ka yangi angur.

Dimapur, Aenjeti/January 22 (TYO): Congress Minority Cell Nagaland ktdangpur tasen shimba sentong ka District Congress Committee Office, Dimapur nung Deobarnü agia liasü.

Iba sentong nung NPCC tir K Therie-i party nung inyakerkem dang nüburtem ajunga nem party nükjidong angatetdaksütsü ajungshi aser lanurtem ya lokti indang sepai lir, anungji nübur temeden kumzüka ayutsüla, ta ayongzük.

AICC in-charge Nagaland, Tripura aser Sikkim, Dr. Ajoy Kumar-i Minority Cell indang ktdangpur tasentem nem tenüngsang agütsü aser ajak dang lungjemtsü ayongzüka liasü.

Paisa Nagaland nung Khristanpur timba süala linük nungbo tajemba lir, ta shia liasü.

Pai party worker dang state nung kinük-kisang ajak sema oa nüburtem den sendakteptsü ayongzüka liasü.

Congress Minority Cell

Nagaland ktdangpur tasen yamai alitsü: Vice chairman - Ata Tapadarr; State Coordinator - Raj Kumar Dey aser Samsher Singh; Social Media- Meikhomlung Rongmei, Suresh Jain- Secretary, Dimapur, Wahid Ali -Assistant secretary, Najrul Islam- president Minority cell, Chumukedima, Md. Sarfraz Alam- vice president, Chumukedima, Shakti Paswan- president Minority cell, Kohima, Dilip Kumar- secretary, Kohima aser Sonu Kumar secretary, Kohima.

Governor-i Tsahyok-Nyi benjong salem lemsatep

Dimapur, Aenjeti/January 22 (TYO): Tikhir adianu aser adianutsür aser Nagaland nung aliba nüburtem dangi Tsahyok-Nyi benjong salem abener, ta Assam aser Nagaland indang Governor, Prof. Jagdish Mukhi-i sangdong ka nung ashi.

Tsahyok-Nyi benjong ya Tikhir kin nungi tetsürtemi amunger. Ibai metsü aremstü

asoshi renemshiba benjong ka lir. Iba benjong sülen ang aluyimer temi metsü azüngtsü renemer. Iba benjong mapang metsü-jangnatsü bendanga agütsür aser meshiteter, ta pai ashi.

Iba tepela benjongmung nung Tsüngremi nenok ajak moajangma, ta Governor-isa ashi.

Election sülen alliance yanglutsü molunga lir: JDU Nagaland

Dimapur, Aenjeti/January 22 (TYO): 14 buba Nagaland Legislative Assembly atema election anogo sangdongba mapang JDU Nagaland-a temolungjang teladak nung iba election nung shilem agia tokteptsü renema lir, ta Janata Dal (United) Nagaland sangdong ka ajanga ashi.

Nüburtemi pei asoshi lenir shimba inyakyim nung tashiyim mesüra senotsü

mamshitsüla, ta sangdong ajanga ashi.

JDU Nagaland-i political party kata dena 'seat-sharing alliance' malitsü telemtetba agiogo saka state nung taruba sorkar tenteta state aser nübur ajangzüksü asoshi yimten tajung ka tentetsü asoshi election sülen mesüktepa aliba party den alliance yanglutsü molunga lir, ta JDU Nagaland ajangasa ashi.

Governor-i Lungwa nung AR post semdang



Dimapur, Aenjeti/January 22 (TYO): Assam aser Nagaland Governor Prof Jagdish Mukhi aser pa kinungtsü Prem Mukhi nati January 21, 2023 nü HQ IGAR (North) kübok Assam Rifles, Mon Battalion indang Lungwa Post semdanga liasü.

Yangji alirtemi governor ya akhi sobaliba yimyattem amshia agizük aser iba sülen Chief Angh'er ki semdang, kong pai yimtsüng ktdangsür, yimten

yimsüsür, CSOs aser Lungwa indang Chief Angh nungertem den sensaksem kaa liasü.

Iba sülen pai Assam Rifles indang Lungwa post semdanga yangji parnok inyaksangshi indang tongmelang agi metetdakja liasü.

Kasa mapang Governor-i anir security conference ka Lungwa post nung agia liasü, kong district nung aliba security agency aser district administration nungi dena liasü.

Nagaland Police-i hopta tsüngta sen crore aika jenjang temesepba chiyongtsü apu

Dimapur, Aenjeti/January 22 (TYO): Election Commission of India ajanga January 18, 2023 nü Nagaland Legislative Assembly atema general elections agitsü anogo sangdonger Nagaland Police-i tanen makai tzüzüng-ozüng shidak amshia tensa aziüktsü aser election tajungtiba nung agitettsü mechi tesem balala nung mita bushiba maparen inyaka arur.

Yamaji tan hopta kising nung Nagaland Police ajanga sen 18,49,73,650 jenjang temesepba

chiyongtsü pua lir. Item chiyongtsü aser hadir apuba yamai alitsü:

- * IMFL - Rs. 21, 25,725/-
- * Narcotics - Rs. 3,43,53,025/-
- * Other contraband - Rs. 14,84,14,000/-
- * Arms and Ammunition - Rs. 50,900/-
- * Other seizures -Rs. 30,000/-

Model Code of Conduct mapa kuma inyaksü atema nüburtem nungi kasa mapang amalitep aser teyaritep imla atar, ta Nagaland Police ajangasa ashi.

"Food Safety is a Shared Responsibility"

Eat Right India Movement - Tongshi Asem

- Pei temang aser temeket merüka yuang
- Chiyongsü yangluba maparen ajak merüka alitsüla
- Tanga chiyongsü tamajungba den memezüteptsüla
- Chiyongsü nung mim alibatem endoktsüla
- Totsü tanaben mamshitsüla

Temang nung 'timtem agütsüba' chiyongsüji chiyongsü masü

- Chiyongsü tasazük shitak : tilala aser mapang shitak nung achitsüla
- Chiyongsü tapu balala : Chiyongsü tapu balala chiang
- Industry nung yangluba temo toksütsüla
- Metsü, chini aser temo ajema achitsüla
- Fortified chiyongsütem chiang

Chiyongsü ya temeli atema dang masü, saka temang aser tekolok atema lir

- Pei alidak züsentetba aser asenalu chiyongsü chiang
- Chiyongsü tedokshi
- Plastic amshiba ajemang aser tanabena amshiang
- Chiyongsü yangludak tzu temenendaktsü
- Chiyongsü yangluba nung mozü kangabo tamshi.

Chiyongsü shitak chiyonga litetbaji nisungtem aser alima asoshia tajung.

Issued in Public Interest by State Food Safety Authority,
Department of Health and Family Welfare, Govt. of Nagaland.

Budget jakdang PM Modi-i minister tem senden ayongzükogo

New Delhi, January 22 (Agencies): January 31 nü Parliament nung budget senden tenzüksü lia Ato kilonser Narendra Modi-i January 29 nü Council of Ministers senden ayongzükogo.

2023 küm nungbo tang mezüing Council of Ministers senden ayongzüker.

Ato kilonser Narendra Modi mendenbuba ser amenba senden nungji Union Minister ajak, Ministers of State (Independent Charge) aser Ministers of State ajak adentsü.

Modi sorkar tanabuba kümsük budget rangbenbo tang tesüsa benoktsü lia ayongzükba Council of Ministers senden ya kanga tongtibang asütsü.

February 1 nü Union Finance Minister, Nirmala Sitharaman-i Union budget benoktsü.

Osang angazükba agi, senden nungji Ato kilonser Modi-i budget senden dak sendakba nung minister tem nem tetuyuba balala agütsütsü.

Modi sorkar kübok tang tesüsabuba rangben budget benoktsü, ibayongji Modi-i Union budget benokba sülen nüburttem atema sorkari inyaktetba osang balala nüburttem nem metetdaksütsü atema minister ajak nem meranga inyaktetba.

Taküm state 9 nung assembly elections agütsü lir, ibayongji sangküm Lok Sabha election nung rangloker Modi sorkari iba budget maangka ya junga agütsü tebilemba lir.

Iba senden nungji India leniba nung G20 sentong balala agütsü aliba atema o lemteptsüa akok. G-20 dak sendakba

sentong 200 shi linük tesem 50 dak tema nung agütsü.

G-20 züngsem linüktem dak alia IMF aser World Bank densema International organization 14-ia item sentongtem nung shilem agütsü, anungji India sorkari item sentong tajungtiba nung agitettsü atema meranga inyaker.

Sorkarisa nüburttem nem-a item sentong nung shilem tajungtiba agidaktsüner.

Council of ministers senden nungji minister temi pepei ministry-i inyaktetba osang metetdaksütsü. Modi cabinet ulushitsü aser melenshitsü tebilemba lir, anungji senden nung iba atemajia o lemteptsüa akok. January 29 nü iba senden amenba sülen anogo ishika tsüingda cabinet ulushitsüa akok, ta osang ka ajanga metetdaksü.

Tanü Tir Droupadi Murmu-i tanur 11 nem national award agütsütsü

New Delhi, Aenjeti/January 22 (Agencies): Hombarnü linük Tir, Droupadi Murmu-i lenla balala nung alakteta inyakteter tanur 11 nem Pradhan Mantri Rashtriya Bal Puraskar (PMRBP) awards agütsütsü, ta ketdangsertemi metetdaksü.

Iba sülen Mongolbarnü Ato kilonser, Narendra Modi-i award angur tanurtemji ajurua jembitsü. Minister of women & child

development, Smriti Zubin Irani-ia tanurtem ajurua jembitsü aser tanurtem nem tenüngsang agütsütsü. Irani den minister of state for women & child development, Munjpara Mahendrabhai-a alitsü.

State aser UTs 11 nungi tebur trok aser tetsür pongu nem iba award agütsütsü.

PMRBP award angur ajak nem medal kaka den sen lakh kaka aser certificate agütsütsü.

"Union sorkari tangar dak alakteta inyakteter tanurtem nem PMRBP award agütsütsü. Lenla trok- Art & culture, tasü aitba, tasen purateta inyaktetba, shisaliok, loktiliba tenzükba aser saisapong nung alakteta inyakteter nem tetushi agütsütsü tetemsü, ibayongji sorkari arrshi küm 5-18 tsüingdapurtem nem iba award agütsütsü," ta sorkar sangdong ka ajanga metetdaksü.

US visa yanglutsü atema talangka matadaksütsü

New Delhi, Jan.22 (TYO) : India nungi US-i onürtem asoshi temelaba visa atema inyakba maparen nung mapang endoka talangka matadaksütsü asoshi inyakteter shimloker aser anogoa sükloka inyakba sentong tenzükogo ta US Embassy India sangdong ka ajanga metetdaksüogoo.

Kasa osang ajanga ashiba

agi, iba sentong ya taoba honibar nü United States Embassy, New Delhi aser Mumbai, Chennai, Kolkata aser Hyderabad Consulates nungi tenzükba shirnoksa tsüingdong arutsü nungdaker item atemaji lapoktsür.

Ano taruba mapangtem nung honibar nü kasa sentong agütsüsa lapoktsütsü. Iba denji ano Covid mapang nung Visa

magütsütemi nangdena alibatem repranga inyaksü atema Washington nungi khen asoshi Consular kar January aser March ita tashi tsüingda arutsü.

US Mission in india-i iba sentong dak sentakba nung B1/B2 appointment talila 2,50,000 agütsüogoo aser Mumbai nungbo Consulate-i anogo nung mapa inyakba mapanga talila kümdayogoo.

TARGET NPSC 2023

PRELIMS
PREPARATION

MAINS
PREPARATION

INTERVIEW
PREPARATION

WITH
NSSB

TOP EDUCATORS
CONCISE MATERIALS

RS. 45,000/- ONLY

JOIN TODAY

TARGET UPSC 2024

GS FOUNDATION
OPTIONAL PSIR | HISTORY

YES, YOU CAN BECOME THE NEXT

IAS

NCS

WE DELIVER QUALITY TEACHING & CONTENT

GIRLS PG IN CAMPUS
BOYS PG IN CAMPUS

CALL NOW @7005114715

ADMISSION OPEN

NPSC PREPARATION 2.0

NEP atema tebilemba balala agizüksü: Dharmendra Pradhan

New Delhi, Aenjeti/January 22 (Agencies): National Education Policy (NEP) ya shidi tapak ishika dang aliba kaketshirtem ajangzükdayaktsütsü atema onük aika lir, ta Education & Skill Development Union Minister, Dharmendra Pradhan-i metetdaksü.

Education ya state tem indang concurrent list nung lir, ajisüaka Tamil Nadu-i NEP agizüksü Centre-i imlar, ta Union Minister-i metetdaksü.

Tamil Nadu kübok Coimbatore nung Avinashilingam Institute for Home Science & Higher Education for Women 34buba Convocation nung jembidang minister-i, NEP dak sendakba nung Centre sorkari tebilemba onüktem aser tasa balala angadangsü melunga dang lir, ta ashi.

"Ato kilonser Narendra Modi-i, ajaki tetsü oshi angazüksüla aser NEP ajanga tetsü oshi angazüksü, azüngtsü aser zülutsü sayuba nung yaritsü, ta shiogo. Sorkari National Council of Educational Research and Training (NCERT) danga taküm nungi tenzükba India nung oshi ajak nung kaket adoktsü asüingdangogoo," ta metetdaksü.

"Pei tetsü oshi nung züingra tanurtem lenla ajak nung tajungba renloktsü aser India nung shisaliok ya mapa

angutsü, tashi angutsü aser shisa angutsü nung rangloker renem," ta pai ashi.

Technology ya teraksatsür tasen ka kümogoo, ta shia Union Minister-i, "Nisung million aikati mobile phones amshir. Internet aser smart phones ya nungdakba oset kümogoo. Asenoki android aser ios ama bendanger technologies nung metaloker, ajisüaka anogo ishika tejaklen IIT Madras-i linük nung 5G atema technology yangluogo," ta metetdaksü.

COVID-19 vaccines dak sendakba nung Pradhan-i, "India nungeri item vaccine agiogo saka asen linük nung vaccine agiba sülen mapang tatsüka tsüingda certificate anguba ama tanga linük mali. India nung item ama technology yanglur," ta metetdaksü.

Tetsürtem nem tashi agütsüba dak sendakba nung pai, "Linük nung Tamil Nadu kanga tejakleni oa lir aser linük nung mapa inyaker tetsürtem teimtibaji alibaji iba state lir. India ya democracy tetsü lir aser tiyongtsüji Tamil Nadu lir," ta ashi.

NEP atema budget kechiba ajemtsü?, tasüingdangba ka langzüdang Union Minister-i, iba osangji tai, ta ashi.

"Sorkar aser Finance Ministry-i akokba tashi new education policy nungiter aser taruba budget nung sen tali lemezüksütsü," ta pai shisem.



TIR YIMYIM YIMOBILEM (EDITORIAL)

DIMAPUR TENTONÜ, AENJETI(JANUARY) 23, 2022

Election mapang bilemdangtsübatem

Election agitsü mapang arur, anungji senso shia asoshi mapa aika lir. Item mapatem rongnung election nung teindang aser tekümdang senso ka jenjang nungi maitsüi shilem agitsübaji asütsü. Election nung shilem agitsüba ya asenok sensosangertem asoshi temeten dang masü saka asenok dak yimten yimsüsürtem shimba mapa nung tashi sayuba mapang ka lir. Akhi chubatem mapang asübo asenok madak yimsü asütsü atema chuba shimba maparen nung asenok shilem kecha mekala, kechiyong chubaji nübortemi mulungba nung shimtsü masü saka chuba mendenji kibong ka senmang amai chubai pei chir nem agütsütsü. Ajisüaka, tanü putu nung yimten yimsüsürtem shimtsü atema nübortem nem temeten aser maongka agütsüba tashi ya kanga tulu, kechiyong teshimtetsang dang nungibo teshimertem tashi tuluba akümer. Aji oda, teshimtetsang masü teshimertem aküm tuluba, anungji teshimtetsangi pa mesüra la shimtettertem akümtsüba tenzüksüsa adoker. Ibaji democracy ajanga nübortem asoshi bener arutsüba maongka aser temoatsüji lir. Ajisüaka, asenok sensosangertemi iba temeten aser tashi jenjangji memetet, anungji kari mamshir aser kari sen aser mapa tilakayong ayoker. Ibayongji, asenok ya ayoktsü aser alitsü akokba osetang ka mesüka akümer. Aji oda, asenok nübortemi ajuruba temenünütsü aser tebilemdangtsü maparentem rongnung kaji, asenoki asenok nem democracy ajanga agütsüba temeten aser tashi amshia shimtettertem kidangi moutetter aser lenmang nunga parnok taru tao nung asenok amokmerena süir amai süir. Aji kechi aser kechiba? Itemji kodang bilemdangdir, item ajakji asenok sensosangertem dak akhüm samaba tamaitüsü alitsü. Shibaibo yimdong zü aser ak kidangi anikettsü? Shibaibo nashi ak jenjang dang nungi teküpbokba agi ayokba nisung ka akhümtsüba süitsü? Shibaibo pei bok mesüa alitsü atema government mapa tilaka yong taküm piyong asoshi ayokba nisung nem akhüm agütsütsü? Iba ama asenok taküm aser asen kibong ya azü ka jenjanga memeyong akümer. Joko, asenoka asen nem democracy ajanga bener arutsüba temeten aser tashi amshia asenoki shimtetba yimsüsür aser lenirtemia akhümtsübutüsü asenoki election nung ya asen temulungsentsü, tashi aser tanüla ajak agi ochishia shilem agitsü tim. Atangji, asenokia election shitak merüka agitsü asoshi jembir aser election nung ochishia shilem agitsü asoshi meranger, ajisüaka aikati makoker, kechiyong asenok temulung külen agi dang merangdang. Ibayongji, shitak inyaksü bilemaka, shitakba mapang atongdangbo asenok taginüba nem asenok tangatetba kokdaktsür. Iba kasaji tamangba tsütsüa asenoki kecha mashishir, asenok atemabo Yisuji masü yimsüsüba menden angutsüsa kokra ojang ta asüba nung party mashi ka nung adener aser mashi inyaker. Aji oda, Yisu kangki nung angenlokba anogo ta tanüka asübo, kü nem party ticket agütsüra ojang aser ni yimten yimsüsüba menden angutsüsa takok ngutetra ojang, ator aser kojajli kü nem kua, ni angenloktsüdi ta meshila ta bilemer. Kasaji, Yihuda Iskariot-ibo sen semer yong Yisu ayok saka asenokibo senpak ka agi ayoker. Iba tashiji asenok tamangba aser tangatetba jenjang aluogo. Joko, asenok tamangertem rongnung ni aser ozü kibongbo kibubasa tenzüksü ta nangzükertemi dena election mapang arudang Khristan yimsü mesayutsü, mamangdaktsütsü aser magizükdaktsütsü nokdang telok anema temulung ajunga agibo ola madoktetter, kechiyong asen yimer aser asen telok asoshi Yisu dangbo MLA mendenji taoba. Aji oda, Yisu agitsü agibo MLA-ang ka agidi ta asüba tamangertemi asenok kumogo. Kasaji, Yisu sülen anidaktsü agibo senso candidate sülen züktepa kutepa asüyonga anidaktsü ta sarasademer apusor tamangertemi asenok lir. Item dangji Laishibaibo tammang chirtem ta ajar. Ibayongji, asenok teindang aser ochiba lenmang mangur südi. Daniel'er medemertemibo 'milak adoka aliba misem nungji onok rongseta süaka, onokibo ozü Tsüngrem dak alaka hon agi yangluba tsüngrem asüyonga mekülemtsü', ta nangzük. Iba tamang aser tangatetbaji tanü election mapang ya asenok dak alitsü kanga nungdaker.

OLEMSABANG

AOR LENNIR KIN-TO TANÜBO TANIDAKER KÜMOGO

~ L. Kika Pongener.


Nagaland State ngur 'Interim Body' kati yimsu sua tenzükdang, asen Ao kin nungi Late. P. Shilu Ao Chief Executive Counsellor sur tenzü. Iba sulen Election agia Legislative Member shimteter külena Pa Chief Minister sur sorkar tenzü. Ano iba sulen term asemben-pezüben tashi asen lenir S.C. Jamir Chief Minister sur Nagaland Sorkar anir aruogo. Nagaland State anguba anogo nungi lenla ajak nung Aor yakbang sur sorkar anir aru. Ajisuaka, mezüng Chief Minister sur Nagaland sorkar anir aruba kin-to tanübo 'Number' anububa-asembuba ta-ka masü, talak nunger jenjang ka kumadokogo. Hau-ni, teti asen Aor dang lenir asütsüla ta-ka masü ako...Alima nung chuba yimli mendenji melentepa yimsu sua aruba menden ka lir. Aji oda, lenisuba shilemji mapang shia kar khen kar khen ta melentepa atatsü. Aji oda, tekolak shilemjisa matayongjia number ana-asembuba tazüngbur shilembosa atatsüla-a ta bilemer. Ano ariana talaklen kar atabajia mepondong nung aliba süngadong, mepongi küleni khen küleni khen ta onshiba amai... Portfolio lemsaba nunga Minister tazüngbur kar pei ataba shilem agi tenuk masüng, talila meromerua ajepba aji mesuzüktsü atema-a asen Aor-i amma aliba-ang alozüker agutsütsüsa ya Aor lennir kin-to iba tashi tangari jenjang keta mezüngshiba...tangari kecha züngoka maliba kin ka aküm no...!!!???...ta aiben temulung shiranga bilemer. Naga lima terenlok atema Center sorkar-i sen sanction agutsüba lemsaba nunga, Aor lennir sur sorkar aniba mapangbo tanü amai ozü par ta kecha tebandang meli-i District kata mesentoki lemsaba ngua ajangshia aruogo, ajisuaka, tanübo Mokochung District-bo kar-kar nungbo melemzüktsüsa, mesura tanga District dang nungi kanga agi tajemba lemsütsüsa ya kechi tai (?)...ta aiben nemjema bilemer. Ya tangar tai asü asen Aor Political leader-temi tangar koka memeshizüktteter...??? ...ta aiben temulung nung asüngdang. Aotsür Aor senso tajungtem... Nagaland sorkar nung tang asenok kechi jenjang nung nokdaka lir...??? Aser tarutsü aliba anogotemji-a koma-ka asütsü ..???...ta asenok ajaki khen shisadangi.

Naga lima terenlok atema Center sorkar-i sen sanction agutsüba, District wise lemsaba nung Mokochung District-bo tanga District lemsüka ama melemzükba, osang kaket/social media balala nung angudang kanga temulung shiranga bilemer. Aji oda, osang kaket nung zülubaji shitak asü meshitak aji tezüluri dang metet, saka shitak dang zülur sudi ta ni ama mashi-memetet nisüngatemibo bilemer. Anungji ibala ama osang azüngdang, Aotsür Aor senso tajung aika mulungjang nung yamai asüngdang... "Aotsür Aor rulling party nung party workertem/politician-temia iba sanction lemsaba ya meteter asü memeteteter ??? Ao lima nungi adokba Tatar-temia iba lemsaba ya meteter asü memeteteter ???...ta aiben ni ama mashi-memetet nisüngatem-ia asüngdang. Sanction lemsaba teimba ka nung Kohima, Dimapur, Chumukedima, Phek item District ya teimba lemsüka angur, aser tanga tanüngba District ajak pei tata shilem lemsüka, saka kangasa tesasatsüka...Mokochung District-bo tangar dang nungi tajemba-ang lemsütsüsa, mesura kar-kar nungbo melemzüktsüsa ya kechi koda asü ??? Center sorkari sen sanction agutsüba ya ashiko, District kar atema dang mejitteta, mesura kin kar atema dangbo magutsüi alitsü sudi. Anungji iba amai tenuk-tebang mesak pei ajung asaa lemsaba nung ya shingai ola madoker no...??? Assembly amendang Aor tashitemeteter kin nungi adokba 'Tatar'-temia iba atema ya langkabo shidanger asü meshidanger?...ta Aotsür Aor senso tajung aikati bilemer aser asüngdang. Aser iba amala osang kaket nung angudang Aotsür Aor kaketshirtem aser lanur tashitemeteter-temia ola madoki ajem-ajema alir no ???...ta aiben süngamanga bilemer. Aor tashitemeteter kin-to tanübo 'Sangkhen moko scu agi alak' amai küma-adok asü koda...!!!??? Teti aküm aguja aliba Aor Elected Member-tem... Nenok kechi komala Political Party ka nungi sudir suang, saka Mokochung District terenlok atemabo tebing ka küma longjemmer jembitsü aser inyaksü onok nüburrtemi nenok dak nungi imlar. Teti akümtsüba aliba Aotsür Aor tular 'Bureaucrat'-tem... Ner Kohima nung mesura Dimapur nungang 'Permanent settlement' sur lia alitsü akok, saka asen tetsü taso lima Mokochung District kodanga mamadoktsü aser mesentoktsü onok nüburrtemi nenok dang nungi imlar.

Taküm February 27th nung asen Naga lima nung General Election agitsü sangdongba osangkaket nung nguogo, anungji tang aruya-a aliba Election nungji asen Aor Politician-tema kechi komala Politics ka asayatsü bilemdar...??? Tang amai tangar sulen-sa anitaktsü asü (?) Mesura akhi putu nung ama aseni anir Nagaland sorkar anitsüba Politics asayatsü (?) Asen Aotsür Aor Politician-tem rongnungi Chief Minister menden abentsüsa nübur tajung tetemsu kata madoktetsü no...??? Tesasatsüka asen Aor o Aor na kati ka atsüzüka yutsütsü arishitepdang asenok tanishir (Leader) agi tanidaker kin ka kumadokogo. Anungji Aotsür Aor senso tajungtem...tang ya danga temulung tanga arur asentenshitsü mapang tajunga ta bilem di arungma. Taruba sorkar nungjibo asen Aori anir terenlok mapa ochishia inyaksü aser kin tuluba-tilaba ta mebendangi ajak sakü-kü züngshia anitsü aser o agi masü, saka mapa agi tatishitsü tajung inyaka sayutsü lenmang bushilaba. Asen Aor tebing ka küma longjemmer Ao lima adener Dimapur jila amala nung, tang MLA ka adoka aliba nung ya ano taliila ka-ana adokdaktsütsü meranglaba. Tesem ka nung dang Aor o Aor na tokteptsü mebilemi tanga tesem nung ka-ka nokdaker adokdaktsütsü longjemmer meranglaba. Asenok dang longjemra takoktsü lenmang sadem-sadema dang lir ta bilemer. Teka nung amma aliba ozü kaji süngadong nung dema aliba ozü ter dang nungi taoba masü no...??? Anungji tang asen ket nung amma aliba ya tangar nem magutsütsü meranglaba. Tsüngremi alemli ama ozü Ao kin moajangma ta asenok ajaki sarasademdi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

China-i 2030 kum America nung pastor David Lin chioktsü



Pastor David Lin



January 22, 2023: China nung America nung pastor ka 2006 kum apuba sülen tang tashi tepuokdak lir; U.S. administration-i pa chioktsü atema meranga inyakba sülen pastor tepuokdak ayutsü kumsük kum 24 ajemtsüogo, anungji pa 2030 kum nungbo chioktsü.

Ajisüaka pa 2030 kum tashiji taküm alitsü asü malistüar memetet, kechiyong 2018 kum nungi pa temang kanga mejungi lir aser tamajungba dang akümer, ta osang ka ajanga metetdaksü.

Tamalen pa nungjem Seventh-day Adventist missionary, David Lin-a China nung jail nung kum aika liasü aser 2011 kum süogo. 2011 kum asusang David Lin-a tepuokdak kum 20 tashi liasü.

Tang jail nung alisang David Lin ya 2006 kum apu aser tang agi kum 17buba jail

nung lir. Pastor David ya 1955 kum aso aser pa United States-i aoba mapang tashi nunga pai Khristan yimsü magizüki liasü. Pa Iowa aser California naprongla nung state ketdangsertem atema adviser inyaka liasü.

Pa kinungtsüi tama Khristan yimsü agizükba sülen pai-a Khristan yimsü agizüka liasü. Iba mapang nungjagi tenzüka David Lin-i mapang shia China semdanga local Arogotem nungita liasü. 1999 kum pa Khristan minister register asü.

2006 kum China nung police-i pa apu aser house arrest asü aser 2009 kum pa taküm piyong tepuokdak ayutsü obendang agüja liasü.

Pa bendangertem puoka ayuba jail nung puokba sülen pai kinungertem dang pa chioktsü atema takhangba

agüja longkak maittsüla, kechiyong iba ya Tsüngremi pa nem lezmüktsüba mission mapa shilem ka liasü, aser iba ya tepuokdak alirtem den Khrista osangtajung sayutsüngitsü atema maongka tajung, ta lemsatepa liasü.

Yamaji pai kum 9 tashi kasa tangatetba nung lia aruogo. 2018 kum December ita nung pai pa meyong Laishiba US nung aliba par kibong dangi yoka liasü, iba sülen pai phone ajanga par kinungertem dang pa temang tamajungba akümer saka jail nung medical teyari junga magütsür, anungji pa chioktsü atema inyakang, ta mepishia liasü.

Ajioda par kinungertemi US Department of State den tongtepratepba sülen tang tesüsa pa jail nung puoka ayuba kumsük kum 24 ajemtsüogo, anungji pa arrshia lira 2030 kum April ita nung chioktsü.

Maharashtra nung police-i Khristan 14 apuba sülen bail nung chiok

January 22, 2023: Maharashtra kübok jila ka nung Khristantemi Hindu nungertem Khristan yimsü dangi meyipdaksütsü merang, ta tai tonglokja police-i tainlonglong ka densema Khristan 14 apu, saka tesülen bail nung chikogo.

Pune district nung Senior Police Inspector, Sunil Godse-i, "Onoki nisung 14 apu saka parnok ajak bail nung chiokogo. Onoki iba ken o bushisüngdangdar," ta metetdaksü.

Khristantemji tebur 10, tetsür asem aser arrshi kum 17 tainlongkong ka lir.

Khristantem jagi yimsü nung ajemdaker tesempa proker aser Hindu nungertem sensakertem Khristan yimsü dangi meyipdaksütsü atema senotsü agi mesüzükba ajanga Hindu nungertem melung yirutsüogo, ta Khristantem nem tai tongloktsü.

Police ketdangser Godse-i, Alandi jila kübok yimtsüngtem nung tang agi tanabenbuba yamai ataloker, ta metetdaksü.

Markel yimdak Hindu nungertem Prasad Salunkhe-i

police dang, "January 15, 2023 nü tebur ana- Pradip Waghmare aser Prashant Waghmare nati kü dang, nai Khristan yimsü indang meteta lir ma?, ta asüngdanga liasü. Iba sülen tenati kü dang taküm jenjang tajungba akümtsü atema Laishiba züngang aser Khristan yimsü agizükang ta ashi," ta metetdaksü.

Khristantem jagisa yimdaklirtem ajurua senotsü agüja Khristan yimsü dangi meyipdaksütsü merang, ta Salunkhe-i police nem metetdaksü.

Paisa, Khristantemi onok dang Hindu nungertem tsüngremtem külemba aser Hindu nungertem lai azüngbaji amajok ta ashi, ta metetdaksü.

January 4 nüa kasa police station nung Khristantem anema ken o benoka liasü. Pastor Sudhakar Suryavanshi den Khristan aseme yimdaklirtem dang Hindu nungertem tsüngremtem kidang nungi agienang aser Yisu dang sarasademang ta ashi, ta tai tonglokja ken o benok.

Alandi jila nung alir Hindu nungertem Uddhav Kamble-i

police dang, pastor aser pa den Khristan kar January 1 nü par kiyongi aruba sülen tsükmenatzü juice agüja ibaji Yisu zü aser ibaji ajemba ajanga timtem khuret ajak samatsü ta ashi, ta metetdaksü.

"Pastor-i onok dang, nenoki Yisu külem tenzü kang. Nenok temang nung timtem ajak samatsü. Hindu yimsü toktsür Khristan yimsü agizükang ta ashi," ta Kamble-i police nem metetdaksü.

Iba tatalokba video ka social media nung prokshiba sülen jila nung tensa raksaogo aser Hindu o Khristantem napronglai longkak ait, ta police-i metetdaksü.

Osangbener den jembidang Catholic putir kari, tai tonglokja alir Khristantemji evangelical telok kar nungi asütsüa akok, ta ashi.

Maharashtra state assembly nung opposition lenir, Ajit Pawar-i shidi ka ajanga deputy chief minister, Devendra Fadnavis dang, state nung Khristantem kumzüktsü atema inyakang, kechiyong kecha kuli makai Khristantem amokmerener, ta shiogo.

ANOGO ABEN TSÜNGREM DEN

Tajung, Tajungba, Tajungtiba

"Aser ya adok, parnoki külemi jembitepa asüngdangtepang, Yisu anasa aru, aser parnok den ao" - Luke 24:15

Kum Tasen! Emmaus leman atalokba otsüji kum tasen den koda tapet- "Yisu anasa ao aser parnok den ao!" School nung asenok grammar subject nung temedemdangba angazük- tajung, tajungba, tajungtiba. Ibai Lai item temedemdangba asem agütsür. Tajung- "Yisu pei sasa." Temedemdangba tajungba- "anasa ao." Tajungtiba- "aser parnok den ao."

Item rongnung mezüngbubaji reprangdangang. Item adianu ana Emmus Lemang nung jashia külemi ao, parnok den tangar masü Yisu aden. Parnok shiba indang jembia liasü iba nübuji kangki nung angenloker külen aser shia arur külen kecha memelenshii parnok den dena liasü. Kasa Yisu kum tasen nung asenok den adenbaji koda senti! Yisuji tesüiba otsü aliba nübu ka dangbo masü. Masü, asen temeimba Master, asen tenük agi menguaka Pa nübu asenok den atangji dena lir; "Yisu peisasa" shibai asen mera shia den sendaktepa aor.

Tanabuba, "Yisu pa sasa anasai aru." Pa maruaka, Pa teti ana liasü. Parnoki ngua Pa maruaka, tanelaren pa parnok anasa teti liasü. Aji oda Pa teti asenok anasa alir, aji saka mapang kar nung Pa aseni ngua arur. Item nisung ana Yisu indang jembia Pa parnok anasa aru ta asenoki angur. Lokti aiben asenoki Yisu indang mejembi mapang odaktsür! Aser iba nung kechi temoatsü magizüker! Kodang Yisu anasa arur teti Pai aseni mangateti aser memeteti aliba jungkai adoktsür, Emmaus leman nung jajaba nisung ana dangjia Pa indang Laishibai shia aliba angatetdaksü aser "amtsük sangsa" dang paa ta ajitetdaksü. Iba kum tasen tenzükdang Pa asenok anasa arutsü. Pai lenman tasen nung tabensaba jungkai adoktsü. Ibaji asoshi na renema lir ma?

Tasembuba, aser tajungtiba: "Yisu Pa sasa anasai aru aser parnok den ao." Kum tasen nung tajungtiba tajungshibaji ibai lir! January 1 nung shiba asenok anasa arur, Pai December tatembangba anogo tashi asenok den alitsü. Pa kija shia den aor, anir, anüker, tasen kumtsür aser Pa taküm tajung asenok den lemsateper. Pai Pa pur telok meimer. Pai anü tesangwa nung Emmaus leman nung jajaba ama asenok leman kumdaktsüner. Kum tepiyong Yisui jembiba o agi asen mulungjang nung rongdakjang.

"Yisu"- apuoktsüba o
"Anasa aru"- parnok mulung nung bilemba Pai metet.
"Parnok den ao"- Kechi ochi parnoki angazük!
Parnok mulungjang arong.

Pope-i Congo semdangba ajanga yirua alirtem zübo aneptsütsü

January 22, 2023: Pope Francis-i Democratic Republic of Congo semdangba ajanga alima dang kum aika rara aliba linük mesendoktsü atema nenshia metetdaksütsü, ta Kinshasa nung Vatican ketdangseri metetdaksü.

Pope Francis-i January 31 nungi February 3 tashi Congo semdangtsü. Pope kati tesüsa Congo semdangbaji 1985 kum liasü. Pope-i linük semdangtsü aliba atema Khristantem kanga mazüngi renemdar, ta kasa osang ajanga metetdaksü.

"Tang Congo-i agizüktsü aliba Pope ya kum 38 tejaklen agizükba Pope John Paul II ama masü," ta Vatican ketdangser Ettore Balestrero-i metetdaksü.

"Tia maka rara aika liasü aser rara manener. Pai nüburtem melung süneptsütsü aser tang tashi azü yima aliba zübo aneptsütsü atema arutsü," ta paisa metetdaksü.

Central Africa nung aliba Congo linük nung Catholic Khristan million 45 lir. 1990s nungi tenzüka iba linük nung rara manener, nisung million aika süogo aser telungpur telok aika poktetogo.

Pope-i Congo nung Goma yimti semdangtsü sentong liasü saka yangji army aser M23 telungpur tsüngda rara aliba ajanga iba yimti semdangtsü aliba thinenogo.

Pope-i Congo semdangba mapang nung February 1 nü rara ajanga takoksa angurtem ajurutsü aser Catholic charity telok balala ajurutsü, ta Vatican-i metetdaksü.

Congo nung Catholic Arogoi tongtibang shilem agia linük nung health structure shilem 40 shi repranger. Arogoi ketdangtsüba nursery, primary aser secondary schools nung tanur million 6 shi züngdar, ta Balestrero-i metetdaksü.

AO OSHI ANGAZÜKDAK:

TANÜ ANGAZÜKTSÜBA OJANG



Orangtet

(v) o payimlen latet, benteta arangtet (Parts of speech)

* English nung orangtet tapu ti tashi lir.

Orapi

(n) süngdong nung tesepe yangluba meja kin tapu ka (type of ants live in trees)

* Orapi dak kongshira parnoki meteper.

OLONG PAITEP # 6407

Grid for crossword puzzle #6407 with numbered starting points.

TIPILEN

- 1. Anenzükdak ki - (5)
3. Asür mangyimba - (5)
5. Temulung nung shisadang - (5)
8. T ___ lu - (3)
10. Takdang temalen - (9)
11. Tesa ___ a - (3)
13. Ajungbena temulungjang tongtonglatsü atu - (5)
15. Tejen lai nung tesayur - (5)
16. Tsüngsak-mopung - (5)

LANGTSÜNGLEN

- 1. Reprangdaksü - (4)
2. ___ ur - (3)
4. Kiojen yangludak - (6)
6. ___ ait - (7)
7. Nagaland nung ayong ka - (5)
9. Küm kasa purtem - (5)
10. Tetsüng tajemeldak - (6)
12. ___ adenshi - (4)
14. Tsünüsenbongsü adokdak - (3)

OLONG PAITEP # 6406 TELANGZÜBA


TIPILEN :

- 1. Kasa, 6. Rangben,
7. Mait, 9. Poktet, 11. Ati,
13. Atasa, 16. Rür, 17. Rajang,
20. Lanu, 24. Nüngjem, 25. Süra.

LANGTSÜNGLEN :

- 1. Khu, 2. Süjak, 3. Onük,
4. Oba, 5. Anü, 6. Ratet,
7. Mozü, 8. Ita, 10. Tar, 12. Tinu,
14. Salem, 15. Aja, 18. Anünü,
19. Taju, 21. Ano, 22. Onü,
23. Kua.

Agüja aliba noksa nung meputepi aliba 10 bushiang



Tanur asoba anogo nung salem osang den noksa angati adokdaksünüra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüing :
2. Tasoba anogo:
3. Küm : 4. Class :
5. School :
6. Talidak :
7. Salem osang :

Tripura nung Congress aser Left party temi sentong ka agi

Agartala, January 21, 2023

(Agencies): Congress aser CPI-Mi aniba Left party temi Honibarnü Agartala nung sentong tulu ka agiogo. Iba sentong ya election matongdang ozüing alema inyaksangba anendaktsütsü atema takhangba den Tripura nung elections tiptema agitsü atema liasü.

Tripura nung February 16, 2023 nü elections agitsü.

Tripura nung Congress aser Left party tem ya 1952 nung toktepa aru aser tang mezüing atema telok ana longjemer sentong agiogo.

Iba sentong nung Tripura nung pezüben tashi Chief Minister inyaker aser CPI-M politburo member Manik Sarkar, CPI-M state Secretary Jitendra Chowdhury, Tripura state Congress President Birajit Sinha, AICC Tripura in-charge Ajoy Kumar, Congress

MLA Sudip Roy Barman, pa tebu aser taoba Chief Minister Samir Ranjan Barman, AICC secretary Szarita Laitphlang aser lennir aika aden.

Congress aser Left Front züingsem meyrjang aikati 'My Vote, My Right', 'Stop Poll Violence' züluba banners aser placards aser linük wako amer shilem agi.

Iba sentong agiba sülen party tenet- Congress, CPI-M, CPI, RSP, Forward Bloc, CPI (ML) aser Tripura People's Party lennirtemi Tripura Chief Electoral Officer (CEO) Gitte Kirankumar Dinkarrao aser tongti ketdangsürtem den ajurutepe.

"Chief Election Commissioner Rajiv Kumar-i anir Election Commission telok kati taoba hopta Tripura semdang saka BJP lennirtem aser minister temi Commission tetuyuba anema ozüing alema

mapa inyaker" ta CPI-M Tripura state secretary Jitendra Chowdhury-i ashi.

EC-i election agitsü anogo sangdongba mapang Tripura kübok tesem aika nung ozüing alema mapa inyaker. West Tripura kübok Majlishpur nung minister ka lenisüba kübok Congress indang national leader ka amak, ta CPI-M lennirisa ashi.

Iba sentong ya political maparen ka masü saka nübortem taginüba akhümtsübua agir, ta Congress lennir Sudip Roy Barman

"Election Commission-i onok dang election tiptema agitsü atema mapa inyaksü nangzükogo. Onoki parnok tsüingdang benokba ken o ajak agizük. Ozüing alema inyaker temi amaktsü akok saka parnoki teinyaksü inyaksü nangzük" ta Roy Barman-isa ashi.

Assam nung kaketshir 400-i Youth20 sentong nung adentsü

Guwahati, January 22, 2023

(Agencies): Assam nungi kaketshir 400 shi kati Youth20 (Y20) summit nung shilem agitsü. Iba sentong ya February 6 nungi 8 tashi Guwahati nung amongtsü.

India nung August 2023 nung Youth-20 Summit ayongzüktsü aser iba atema Y20 themes pungu nung senden balala amentsü.

"Tetoktepa balala nung prize winners dena kaketshir 400 tashi February 7 nü IIT-Guwahati nung agitsüba sentong nung adentsü. Parnok nem Innovations & Industry-Academia linkages

tesayuba agütsütsü" ta sorkar ketdangsür kati ashi.

Alima tesem balala nungi teshimtet nübo 250 tashi Guwahati nung ayongba sentong nung adentsü.

Iba sentong nung Future of Work; Climate Change and Disaster Risk Reduction; Peace Building and Reconciliation; Youth in Democracy and Health, well-being aser Sports omen pungu nung ajemdaker shisalen sayutsü.

G20 umbrella kübok official engagement groups 8 rongnung Youth20 ya ka alir.

Iba sentong ya G20 sorkartem

aser lanurtem tsüingdang tesentaktep atema agir.

2023 nung Y20 India Summit nung India-i lanurtem asoshi mapa inyakba sayutsü aser alima tesem balala nungi lanurtemi maongka angutsü.

"Y20 meeting nung shilem agitsü atema January 19 nungi Assam kübok district 34 nung Universities/Colleges 50 tema nung seminars, workshops, debates, and panel discussions agitsü" ta sorkar ketdangsüri metetdaksü.

Item sentong nung college mesüra university students 12,000 temai shilem agitsü imlar.

Assam nung Adivasi telungpur 46 temai adok

Tezpur, January 22, 2023

(Agencies): Assam kübok Sonitpur district nung Deobarnü All Adivasi National Liberation Army (AANLA) lennir aser züingsem 46 temai adokogo.

Telungpurtemi Dhekiyajuli nung Additional Superintendent of Police (crime) aser Deputy Superintendent of Police (border) na den district police ketdangsürtem tsüingdang temai adok.

Assam nung lisopur telungpur telok 8 rongnung AANLA ya ka lir aser parnoki September 15, 2022 nü New

Delhi nung sorkar den yimjung tenangzüktep nung sign sütepa liasü. Iba sentong nung Union Home Minister Amit Shah aser Assam Chief Minister Himanta Biswa Sarma na dena liasü.

Deobarnü AANLA telungpurtemi pistols 8, rifles 6 aser injangtem agütsü ta police ketdangsür kati ashi.

"AANLA züingsem 46 temai adokogo. Parnok 'president' D Nayak taoba mapang temai adok aser tanü iba sentong nung pa aden" ta ketdangsürisa ashi.

Yimjung tenangzüktep

ajanga süngolu ayimer kintem temeten kümzük ayutsü ta amangba agi AANLA telungpurtemi temai adokogo ta Nayak-i ashi.

"Onok temeten atema onoki rarayonga aru. January 2012 nung sorkar den yimjung olemtep atema kishi lapok" ta paisa ashi.

"Küm aika olemtepa aruba sülen yaküm tenangzüktep nung sign sütepe. Iba ajanga onok kin indang temeten kümzük ayutsü lateta lir anungji onok temai adoktsü lemtet" ta Nayak-isa metetdaksü.



Army Chief Gen Manoj Pande-i Honibarnü Eastern Army command indang headquarters semdangdang agiba noksa ka angur. Iba mapang Chief of Army Staff (COAS) Manoj Pande-i Arunachal Pradesh aser Sikkim nung Line of Actual Control (LAC) nung maparen meyipa repringshi aser Kolkata nung commander temi pa den osang lemsatep.



Jan. 22, 2023 : Deobarnü Lunar New Year mapang Hong Kong nung nüburtem mask agir teronem menemba süng rongka külem-kejaba noksa nung angur. China nung January 13 aser 16 tsüngta Covid agi nisung 13,000 jungnüa mozü kidang asü aser tan ita asür nisung 60,000 jungogo.

Taoba hopta China nung Covid agi nisung 13,000 jungnüa asü

Beijing, Aenjeti/January 22 (Agencies): China nung January 13 aser 19 tsüngta mozü kidangi Covid dak sendakba nung nisung 13,000 jungnüa asü, kong health ketdangsür kati nütsüing timba iba virus agi menepogo ta shia liasü. Hopta ka tejakdang China nung mozü kidang Covid agi January 12 tashinung nisung 60,000 jungnüa süogo ta shia liasü, ajisüaka Beijing-i taoba ita virus azüokba ozüngtem arsanga agienba sülen ketdangsür temi züngdangba nung tamang makateter. China indang Center for

Disease Control and Prevention (CDC) ajanga Honibarnü sangdong ka nung ashiba agi, mozü kidang shiranga alir nisung 681 bo coronavirus menaba ajanga tango mesashiteti asü aser ano nisung 11,977 danga tashidak den meyokteper asü. Item ya kidang coronavirus agi asürtem maden. Airfinity forecasting firm ajanga ashiba agi, Lunar New Year benjong mapang China nung anogoshi Covid agi nisung 36,000 shi asütsü. China nung December ita zero-Covid policy toktsüba sülen linük nung iba tashidak

agi nisung 600,000 dak tema süogo, ta Airfinity ajanga asadangteta lir. Lunar calendar nung benjongmung tulutiba amungtsü asoshi mapang talangka nungi yongya ataba ama nisung million aika linük tesem balala sema kinungertem ajurua jajar aser iba benjong ya Deobarnü ajurur. Ajisüaka nütsüing yongsük shilem 80 jungnüa dak iba virus agi menepa lir asünung Luna New Year sülen kidangi meyiba shilangba mapang ita ana nungi asem tsüngta China nung Covid wave tanabuba malitsü, ta health ketdangsür kati ashi.

Burkina Faso nungi France sepai ainshitsü akhanger

Ouagadougou, Aenjeti/January 22 (Agencies): Burkina Faso nung mitkari kumteta aliba sorkari iba West Africa linük nung amenoka aliba France sepaitem dang ita ka tsüngta par linük yutsür aotsü totuyuba agütsüogo. Iba telemtetba ya Agence d'Information du Burkina (AIB) ajanga Honibarnü sangdong aser ibai France aser taoba mapang par kübok aliba colony tsüngta taoba küm September ita mitkari sorkar tanaben atsüngdokba sülen tesendaktep tamajungba akumba temaitsü tasenbaji alitsü. AIB ajanga ashiba agi, mitkari kumteta aliba sorkari 2018 military accord ka Bodhbarnü agienogo, kong linük nung France sepai alitsü mela lir. Paris nungi telangzüba kecha agüja mali. Burkinabe mitkar den tesendaktep aliba osang ka ajanga ashiba agi, Ouagadougou ya France den tesendaktep rakdang masü aser tang tesüsa sangdongba ya mitkar tesendaktep asoshi tezüngzüktep atema kisüng lir. Burkina Faso nung France indang special forces sepai 400 shi lir aser parnok ya al-Qaeda aser ISIL (ISIS) den sendaktepa aliba telok balala den rarar. Burkina Faso ya alima nung tesensaktiba linüktem rongnung

ka lir aser yangji Mali nungio Sahel tashi pokloka oa küm ter dak tema rara arudang civilian meyerijang aika tepsetogo. France nungi sepaitem arua liaka tensa tajungba makumer ta parnoki bilemer aser linük nung France anema nokdakba tang tali akumer. "Parnok Burkinabe nung hadir tulu aser tashi bener liaka onoki kiralongrar den raraba nung takok angutsüsa parnoki meyariteter," ta social activist aser kentener Passamde Sawadogo-i ashi. "Anungji parnok nungi pilatsü tang ya mapang lir, aser transition government-i ibaji tasü ita inyaker," ta pai ashi. Hokulbarnüa Burkinabe nübur noklang aika adenshia linük yimtiba Ouagadougou nung French envoy meindoktsü aser Burkina Faso nung par mitkar amenoka aliba tesemtem shibangtsü takhangba agüja liasü. Parnoki iba mapang Mali aser Guinea lenirtem - tenaprong mitkar tashi amshia yimsüsüba mendeni aru - aser Russia Tir Vladimir Putin nung noksa tulu bener jaja liasü. Burkinabe nung mitkar tashi amshia sorkar atsüngdokba lenir Captain Ibrahim Traore aser ano al-Qaeda aser ISIL (ISIS) den raraba sepaitem busemba sayua iba sentong ya ayongzüük, ta iba sentong ayonger

rongnung Mohamed Sinon-i ashi. "Ibai pan-African movement ka lir aser onoki Burkina Faso aser Russia tsüngta tesendaktep aginer, aser ano Guinea aser Mali tsüngta tesendaktep nung tashi itshiner," ta pai ashi. Mali ya taoba mapang Paris kübok liasü aser parnoki taoba küm France sepaitem par linük nungi ainshitsü totuyuba agütsü. Küm toku tashi al-Qaeda aser ISIL den sendaktepa aliba telungpur telok balala den rara aruba sülen yangji aliba France sepai 2,400 nungi tanüngba ajak August ita ainshiogo. Tang parnok aika Niger aser Chad nung amenoka lir. Mali nung tangbo Russia nungi taa agia rarar Wagner Group nungi anir arua lir, aser parnok yagi meimchir temeden anema inyakba nung tai tonglokja lir.

Lunar New Year benjong sülen LA nung nisung 10 khaset

Los Angeles, Aenjeti/January 22 (Agencies): Lunar New Year benjong ka amungba sülen Los Angeles anütoklen nisung ter tepset aser ter yiruogo, ta police-i ashi. Iba benjong nung nisung meyrejang aikati shilem agir. Los Angeles County Sheriff's Department nungi sergeant Bob Boese-i ashiba agi, iba lendong ya Honibarnü Monterey Park kübok Garvey Avenue nung ataloka liasü. Nisung tepsetsang ya tang tashi jenshia senzüdar, ta police-isa metetdaksü. Iba tesem nung lendong atalokba ajanga aser asürtem nem aküm tetushi agüja Monterey Park nung Deobarnü benjong amungtsü aliba thiogo, ta police-isa ashi. Monterey Park nungi osangbener aser videographer Sean Backner-Carmitchel-i Al Jazeera dang lendong atalokba indang osang tejangja monguteti lir, ta ashi. "Lendong nung asürtem tenüng tang tashi mejangjai lir aser iba tesem amakba nukjidong kechi liasü ajia tang tashi mejangja," ta pai ashi. "Iba tesem nung adenshia alirtem aika aoksataper lir." Monterey Park ya downtown Los Angeles nungi km 16 shi pila yimti ka lir kong nütsüingyongsü 60,000 shi lir

asur parnok timba Asia nungertem lir. "Kidanger yimti Monterey Park nung lendong atalokba nung asür kinungertem den asükhü lemsateper," ta Los Angeles City Controller Kenneth Mejia-i twet asü. Nisung khasetba tesem anasa aliba Clam House seafood barbecue restaurant kibur Seung Won Choi-i Los Angeles Times dang ashiba agi, nisung asem par restaurant-i aritepa aru aser pa dang kishi shibangtsü atema shia liasü. Item nisungtemyagisa Choi dang nisung kati machine gun ka bener lir aser pa ket nung ano injang aikabena lir, ta ashi. Choi-i ashiba agi, iba lendong ya dance club ka nung atalok asütsü ta bilemer. Anogo ana amungba benjong ya Honibarnü tenzüük, koba southern California nung Lunar New Year sentong tulutiba rongnung ka lir. Iba tatalokba densema US nung iba ita lokti dak injang khaloktsüba tatalokba pongu tashi atalokogo. Iba ita Uvalde, Texas kübok school ka nung nisung 21 tashi tepseta liasü. Colorado Springs nightclub ka nung ita ana tejakdang nisung pongu tashi khasetba sülen tang iba lendong atalokogo.

Brazil Tir Lula-i army commander mapa nungi anentsüo

Brasília, Aenjeti/January 22 (Agencies): Brazil Tir Luiz Inácio Lula da Silva-i linük indang army chief mapa nungi anentsüogo. Linük yimtiba nung hopta ana tejakdang mepetmesü tulu adokba sülen tang iba jenjang agiogo. General Julio Cesar de Arruda ya December 30 nü-ang iba mapa abentsü atema shim. Pa ya taoba tir Jair Bolsonaro mapa nungi anentsüo lia shima liasü. Tir Lila-i, longkak aitertem den armed force züngsemtem densema liasü ta temulung melemer. Pai tawa military officer aika mapa nungi anentsüogo. Bolsonaro pusemer meyrejang aikati January 8 nü Brasília nung sorkar ki aika maka liasü. Iba lendong nung police aika yiru aser longkak aitertemi presidential palace, Congress aser Supreme Court raksaja liasü. Iba anogo nisung 2000 shi pua liasü aser nisung 1200 shi tang tashi sota yua lir, ta Brazil federal police sangdong ka ajanga metetdaksü. Supreme Court-i iba tatalokba

ken o bushisüngdang tenzüükogo aser bushisüngdang nung Jair Bolsonaro-a densema lir. Prosecutors temi ashiba agi, taoba küm tir election indang video ka post süa taoba lenir yagi rongmesor iba mepetmesü adokdaksü asütsü akok. Ajisüaka pa pusemertemi longkak aitiba nung pa densema mali aser pa khuret masü ta Bolsonaro-i shiogo. General Arruda ya tir den kanga junga sendaktep aliba military commander General Tomás Ribeiro Paiva-i melenogo. Pai iba hopta tetenzüklen sepaitem dang tir election indang result agizüütsü ateam shiogo. October ita election agiba nung ochimashi inyakyim sendaka lir ta aitsüba ajanga Bolsonaro pusemertem aika rongmeso. Tir Lula shiba 2017 küm ochi mashi ken o nung aija tepuokdaki yok, pa tanaben tir asütsü shimba atema nisung aika mepelar. Iba mepetmesü adokba ya Lula-i Bolsonaro dak tai tongloktsüogo, aser iba den armed force züngsemtemia shilem agiba aitsüogo.



Jan. 22, 2023 : Ato Kilonser Benjamin Netanyahu's sorkar tasenbai judicial system anentsü sentong yangluba anema Tel Aviv nung Israel nung meyerijang aika adenshia longkak aitiba noksa nung angur.

Kunlavut aser An Seyoung nati India Open kokogo



India Open 2023 tetsür jika asaya akokla South Korea tsür An Se Young (tabelen) aser runner-up Japan tsür Akane Yamaguchi na sempet agütsüba sentong nung tangokba noksa nung angur.

New Delhi, Aenjeti/January 22 (Agencies): Thailand nunger asayar Kunlavut Vitidsarn and Korea tsür An Seyoung nati Indian Open tetsür aser tebur kija asaya kokogo.

Deobarnü final asaya nung Vitidsarn-i world championship anaben tashi koker aliba asayar Viktor Axelsen akok aser An Seyoung-i Japan tsür Akane Yamaguchi madak takok ngua liasü.

Tebur kija asaya nung Kunlavut-i, 22-20, 10-21, 21-12 agi Denmark nunger Olympic champion Axelsen koka tang mezüngbuba Super 750 tournament ka kokogo. Kasa mapang nung An-i tetsü kija

asaya final nung world No. 1 asayar Yamaguchi 15-21 21-16 21-12 agi koka liasü.

Kasa asayamung tebur tarep asaya final nung World No. 11 Liang Wei Keng aser Wang Chang nati Malaysia nunger third seed tarep Aaron Chia and Soh Wooi Yik 14-21 21-19 21-18 agi kokogo. Taoba küm Japan Open akokba sülen tenati tang agi tanabuba World Tour title ka koktetogo.

Asayamung nung tanungba final asaya ya team ana tashi masayatetsüsa akümiba sülen masayai liasü. Temang nung timtem adokba ajanga China nunger tarep anati shilem magitetsüsa kuma liasü.

Wang Yi Lyu, shiba Huang Dong Ping den külemi tarep temeyoktep asaya nung asayatsü liasü aser Chen Qing Chen shiba Jia Yi Fan den külemi tetsür tarep asaya nung asayatsü liasü, tenaprongla shirangba ajanga final nung shilem magitetsüsa aküm. Tenaprongla diarrhea agi kangshir aser ibayongji masayatetsüsa aküm.

Final masayatetsüsa akümiba sülen Japan nunger tarep Yuta Watanabe aser Arisa Higashino nati tarep temeyoktep asaya akok aser Japan nungisa Matsuyama aser Chiharu Shida nati tetsür tarep asaya koka liasü.

Australian Open: Tsitsipas & Rybakina na quarter-finals-i iogo



Melbourne, Aenjeti/January 22 (Agencies): Deobarnü Australian Open tebur kija asaya nung Stefanos Tsitsipas-i Jannik Sinner madak takok ngua quarter-finals-i iogo.

Küm ka tejakdang Melbourne Park nung Sinner tsükdaktsüba sülen third seed asayar Tsitsipas-i taküma pa Rod Laver Arena nung round pezübuba asaya nung 6-4 6-4 3-6 4-6 6-3 agi tsükdaktsüogo.

Asaya nung Tsitsipas-i mezüngbuba set ana akok ajisüaka Sinner-ia asendenshir kanga junga asaya tanabuba set ana akok, ajisüaka decider asayaba mapang Tsitsipas-i game trokbuba nung Sinner indang serve break süa asaya koka liasü.

Pa quarter final nung Arishi

küm 21 tain Czech nunger asayar Jiri Lehecka den semifinal nung jenjang ka atema asayatsü.

Kasa asayamung tetsür kija asaya nung Wimbledon champion Elena Rybakina-i No. 1-asayar Iga Swiatek straight sets nung koka tang mezüngbuba Australian Open quarterfinals tongtetogo.

Asaya nung Rybakina-i service kanga ajanga ao aser Swiatek süngjemshir asayatsü maongka magütsü asaya 6-4, 6-4 agi koka liasü.

"Ni kanga tongtibang mapang nung junga asayaogo. Hau ni court-i aiba shia nervous asür. Ajisüaka ni teti süngjema dang alir. Ni takok tashi ni bilemba mesayatsü meranger," ta arishi küm 23 tain

Kazakhstan tsür la yagi ashi.

Swiatek-i tang tashi nung Grand Slam asem tashi koker lir, kong taoba küm French Open aser U.S. Open akokba densema lir.

Rybakina ya Moscow nung aso saka 2018 küm nungi Kazakhstan tenung nungi asayar. Kazakhstan-i la nem la tennis career atema senotsü teyari agütsütsü maongka agütsüba sülen la iba linük tenung nungi asayar.

La quarterfinals nung taoba mapang French Open champion Jelena Ostapenko den asayatsü, shibai arishi küm 18 tain America tsür Coco Gauff tsükdaktsüogo.

Deobarnü Margaret Court Arena nung round pezübuba asayaba mapang Ostapenko-i 7-5, 6-3 agi Coco madak takok ngua tang mezüngbuba Australian Open nung quarterfinals tongtetogo.

Ostapenko, shiba tatemsa Grand Slam quarter-final ka Wimbledon nung 2018 asaya liasü, la yiruba ajanga junga masayateti aruogo aser lai tang mezüngbuba Australian Open nung top-10 nung aliba asayar ka kokogo.

Ayodhya nung agitsü aliba WFI General Body senden thiogo

Aenjeti/January 22, 2023 (Agencies): Sports ministry-i Wrestling Federation of India (WFI) inyakyim ajak thitsüba den inyakyim achaayangtsü atema Oversight Committee ka tentettsüba sülen Deobarnü agitsü aliba WFI senden thiogo.

Iba committee yagi WFI tekolakba Brij Bhushan Sharan Singh anema ochimashi aser sexual harassment ken o benoka aliba bushisüngdangtsü. Bushisüngdang metembang tashi WFI tekelokba ya pa indang menden nungi atsüngina atatsü.

"Asayartemi Federation anema ken o balala benokba bushisüngdangtsü atema Oversight Committee ka shimtsü asoshi sorkari telemtetba agiba dak sendakba nung Ministry of Sports-i Wrestling Federation of India nem osang agütsüogo. WFI-i tang benoka inyaka aliba inyakyimtem ajak sota atatsü aser Oversight Committee ka shimba sülen WFI indang anogoshia inyakyim iba committee yagi achaayanga atatsü," ta ministry-i sangdong

ka ajanga metetdaksü.

"Inyakyim ajak sota atatsü atema tetuyuba agütsüba dak ajemdaker Sports Ministry-i, WFI dang Gonda, UP nung tang asaya aliba Ranking Tournament athitsü asoshi tetuyuba agütsüogo. Ministry-isa WFI dang iba asayamung nung asaya aliba asayartem nem parnok indang entry fees meyipa agütsütsü asoshi tuyuogo," ta kasa sangdong ajanga metetdaksü.

Sports Minister Anurag Thakur den ajurutepa, parnoki benokba ken o tem ajak tatongi bushisüngdangtsü ta tenangzükba agütsüba sülen longkak aita aliba asayartemi parnok sentong anena atatsü telemtetba agiogo.

India nunger rongnungi nungtuwu wrestlers Bajrang Punia, Vinesh Phogat, Sakshi Malik aser tanga wrestler temi January 18 nü WFI anema longkak aita liasü. Arishi küm 28 tain Phogat-i ashiba agi, Brij Bhushan Sharan-i tetsür wrestler tem dak mebeshitsü yinya beshir ta shia pa aija liasü.

Wolves-i defender Craig Dawson alizükogo

Aenjeti/January 22, 2023 (Agencies): Wolves puri West Ham nungi defender Craig Dawson pound 3.3 million yong alizükogo.

Arishi küm 32 tain England nunger asayar den küm anaser tesadang atema tenangzüktepba yangluogo koba Wolves puri January ita alizükba asayar pezübuba asütsü.

Taoba West Brom centre-back Dawson, shibai Premier League nung asaya 246 nung asayaogo, pa taoba season ana Hammers nungi asaya liasü.

Manager tasenba Julen Lopetegui kübok club-i midfielder Mario Lemina, winger Pablo Sarabia aser forward Matheus Cunha nungera aliogo.

Dawson, shiba tatemsa West Ham puri FA Cup nung Brentford pur akokba asaya nung shilem agia liasü, pa Deobarnü City den asayatsü aliba asaya nung shilem agitsüsa register mesüi liasü.

Pa 2020 küm October ita loan nung Watford nungi West Ham nung oa aden iba sülen West Ham den tenangzüktepba ka yanglua liasü.

Hammers nungi pai 87 ben asayaogo aser iba mapang

goal pongu idakja liasü. Taoba küm West Ham pur semifinal tonga asayaba mapang pa Europa League knock our round nung asaya trok prongla nung tetenzük nungi asaya liasü.

Iba tetoktepba nung West Ham puri last-16 nung Sevilla tsükdaktba asaya nung pai kanga junga asayaba ajanga Lopetegui temulung asü.

Kasa mapang nung Wolves forward Fabio Silva, season tanungba ajanga PSV Eindhoven nung loan nung oa asayatsü renema lir.

Arishi küm 20 tain asayar ya iba season tesadang ka Belgium nung Anderlecht nungi asayaogo aser pai league asaya 20 nung goal tenet idaktsüogo aser pa tang Eredivisie nungi asayatsü, shirnok league nung temaba jenjang nung aliba Feyenoord team dang nungi point ana agi tajemba lir.

Silva, Europa Conference League nung Anderlecht nungi asayar liaka Uefa temzüng ozüng kübok pa PSV pur taruba ita Europa League play-off nung Sevilla den asayatsü aliba asaya nung shilem agitetsü.

BILEMDANGANG

"Arentaka aser tasü metti bilemba mapaji inyaktsü merangang."